

三三醫書第二集第二種

崇實堂醫案

杭州三三醫社出版

崇實堂醫案
第二種
提要

本書一卷首列芻言一大帙所言皆道破醫界
積習爲清丹徒姚龍光先生之遺著自述因抱
恙極危就醫咸束手且受診視上之留難等痛
苦遂發憤矢志研究醫學故所記症胥爲疑難
不易治療者先生以己飢已溺之懷細心診斷
而得霍然且探原竟委說出病之所因治之所
據爲臨診者開無限法門前蒙社友張相臣君
寄惠又荷函命刊入本集以惠醫林遵特付刊

崇實堂醫案王序

壬午癸未間余差旋日東治防軍京口江上日乘馬權櫂周覽山椒水滢謂北

府西堂爲六代勁兵處長山蜿蜒大江南折入毘陵驛奇瑋絕特之氣如玦之

抱於丹徒一鎮其中必有布衣慷慨命世英絕坐嘯風生於戶牖下者陰物色

久之不可得鬱結懷抱者二十年持節撫皖時乃得姚君石荃名錫光讀其所

著長江礮台芻議東方兵事記東瀛學校舉概諸書沈毅精實於兵謀地勢學

術人才深得彼己短長消長窾會所在既深異之詢其里則世居丹徒鎮向之

願見者差可一慰叩其鄉人物復有如君者石荃但遜不答他日有以崇實堂

醫案見眎者則石荃母弟晏如明經譯也聞晏如明算學治古文留心經世之

學醫特其居家衛生所注意然讀之終幅輒覺今之事事拘守殘缺承襲譌誤

小則誤身大則誤國晏如乃欲同志有力者出爲領袖創辦學堂學報振興醫



學先出其所閱歷以與人士相印證不吝其長不護其短是非得失與天下人共見之因是以改良遷善去其錮習進其新理俾他日吾國人撰新學史者仿泰西史例而書曰吾國曩年戶口冊每若干人中歲死一人自姚某興醫學後竟進至若干人歲死一人較某年以前人增幾歲又閱數十年合吾國人又增幾歲姚君固不必以爲功而使人人知實學之有益虛憍之貽禍幡然而革其愚妄之俗則晏如之與石荃皆可出可處無時而無斯人吾與之心也丹徒人物之志殆可以二姚起例哉余益爲之神往於圖峯京峴間也石荃以拔萃孝廉任州邑有聲近以觀察隸北畿駿駿大用矣聞其鄉之儕耦尙有被褐而懷玉者余旣幸覩晏如之書他日見晏如幸告我襄陽耆舊猶有其人無使余復憾見石荃而未見晏如也清泉王之春書

崇實堂醫案自序

龍光幼從庭訓專心制藝兼習算學均未能入室登堂造乎極地二十七歲患陽虛弱症咳嗽痰多神疲食少肌膚瘦削舉步維艱歷經名手調治苓連清熱參朮補虛方藥雜投病勢日劇親戚朋友皆爲予危適吾家又有病感者敦請一世交前輩診視而前輩故意留難百端推托龍因忿而矢志習醫思利己以利人必不蹈時醫惡習也遇同學王吟江先生精通醫術閱書既廣求理亦深爲開書單指以門徑龍乃照單購辦誦習講求注傷寒者閱視二十餘家逐條比較擇其精當者另爲摘錄若金匱則專論雜証者也夫雜証亦有六經表裏之辨凡論雜症須從傷寒條例分經施治方能得當而傷寒論中所不能包者仲景乃著金匱以補之故金匱之文多片言居要索解最難後世就金匱而譚金匱語非隔膜即屬支離古今注金匱者卒鮮善本江西喻嘉言醫門法律辨

論病情深入顯出妙義環生實金匱之功臣也醫有三大法門一爲傷寒六經病一爲金匱之雜症一爲葉氏之溫病傷寒雜症由仲景入手下及劉李朱張歷朝名家專集比擬考求自能發明其理若溫病有內伏有外受前賢議論多未得當即喻嘉言黃元御亦未能透澈此關惟葉天士王士雄闡發經文獨樹一幟溫熱經緯一書極爲簡明精當若能時時參究亦思過半矣然龍讀書十餘年閱書數十種辨別病情叅詳脉理撫躬自問業已殫盡心力而於臨症時憑脉辨症尙未能一一了然迺知人之病証變化萬端方書所論一証僅就一証而言不能窮其變化因思此非明師益友隨症指點不能盡其神妙不測之奧乃在左近名醫處留心考察實存私淑於人之心孰意負盛名者竟鮮其實類皆拘守套方以藥試病孰能見理明決預定病勢之吉凶先言愈期之早暮哉而所以得時名者有三術焉一則見病勢稍重便有防變推托之辭爲日後

愈則居功變則諉過之地步此其一也一則專選平淡和平之藥動曰爲某某湯頭所加減以博穩當之名可告無罪於天下此其二也一則和顏悅色溫語婉詞動效奴僕之稱求媚於婦女庸愚之輩使至死不悟此其三也得此三術衆口揄揚而成名醫之身價矣舉世悠悠孰分涇渭而我輩欲求明師益友安可得哉思索再三翻然有得曰與其求師於此輩仍不如效法於古人因添購醫書廣搜醫案見李東垣汪石山陸養愚孫一奎等著述辨症精詳應變神妙分真僞於毫釐之際顯神效於廣座之前數語破的可以釋無限疑團是皆名師之指示也卽見聞之閱歷也龍又叅究數年略開會悟然終不敢自信若得明哲之口傳當更有甚於此者但見聞既陋限於偏隅因籌一法焉將歷來診治之病除尋常不錄外凡病勢危劇或病情隱晦其設法救轉與救之不轉者略刻數十條舉以問世倘有學問深純見識明敏指我之疵破我之惑一批

出加以案語由郵局奇贈鄙處龍則束裝就教拜列門牆若路途遼遠有願難償亦必馨香祝之奉爲師表不勝幸甚士君子毋以不材見棄置之不論不擬之條則所賜多矣存心如此同志覽諸

光緒二十七年八月 日江蘇丹徒縣丹徒鎮晏如氏姚龍光謹自記於和州官署

崇實堂醫案薛序

昔范文正云不爲良相必爲良醫儒者讀書談道期以成已成物量甚宏志甚遠也醫則權在於已隨在施吾術卽隨在普吾仁此濟世之心古人所以多寄於醫也雖然良醫豈易爲哉嘗見近世習醫之輩指示旣乏名師探討又無實力惟於尋常習見之書披覽一二不數年遂出而臨症學問愈淺識見愈卑於寒熱虛實表裏茫然莫辨但拘守古方以藥試病及治之無效遂諉爲不治之症庸醫殺人往往而是間有一二有志之士廣集群書徧爲研究而諸家論說不無各有所偏斯學者推求每覺難衷一是苟非由淺入深由博反約鮮有不昧厥旨歸而終多隔膜者良云乎哉吾友姚君晏如爲徒邑名諸生工制藝兼精算學弱冠後補廩食餽蜚聲庠序奈功苦太甚漸致體弱多疾數爲俗醫所誤其瀕於危者屢矣遂慨然曰吾不能爲良相吾奚不可爲良醫利人利己

挽回末俗非異人任也爰乃購書數十種究心數十年將歷朝諸名家書集融會而貫通之其識力超卓有迥出尋常萬一者辛丑秋遇於和陽州署聆其緒論予既聳然異之又閱其所集醫案類皆疑難雜症無不應手輒效而詞義又復明白曉暢令閱者一目了然此真當今之和緩後學之津梁也爰力勸付梓以公同好噫中國醫學之不講幾百年矣得姚君以發明之醒舉世之迷途登斯民於壽域文正所謂必爲良醫者予於斯人見之矣爰樂而爲之叙時在

光緒二十七年歲次辛丑中秋前一日同里弟薛書培拜稿

崇實堂醫學芻言

我中國各種學問須借文字以傳若文字不佳即至理名言類多湮沒篇法必求簡潔句法必求精煉極高極深之理隱括於數語數字之中初學者無可入門淺見者莫窺堂奧醫學之深亦盡如是故習醫之輩鮮克有成余鑑乎此凡議症說理處總以明白曉暢人人皆知爲本但行文不免有繁複之處識者諒之不以文法之疏議之斯幸矣

我中國醫學精深廣大見理之真似勝西人醫學而今日凌夷甚矣非醫學不善也由於行醫者多非其人亦由於習醫者不得其法學者肄業之初必須由淺而深由外而內先明軀殼之血脈經絡而後推及於臟腑知臟腑之功能測氣血之行度能識未病時之形狀始能得已病時之真情此入手工夫最爲切實者也中國剖割不行無從實驗方書所載軀殼臟腑等件均模糊

無據之詞即古人選本所云淺近者又皆按症略載數語將病之曲折隱微虛實寒熱名賢辨別之處精當之理概行刪去有如經驗良方於人之形體病之淺深又無一語論及故中國醫學絕少入門考據之書以開其智慧此惟西醫論之既詳且盡入手之功夫須讓西人獨步既由外而推內復驗實而攻虛學者有形迹可求步步皆有準的及入理既深憑脈辨症推測病情則中醫較勝吾故曰西醫爲前半功夫中醫爲後半功夫彼此皆不可厚非嘗見人涉獵西書識得藥水便極力表彰西學誹謗中醫此等人非特不知中學之淺深亦並不知西學之淺深也

凡病分兩種一曰客感一曰雜症客感中雖傷寒溫熱不同而溫病之理仍具於仲景傷寒之內苟能參究傷寒之六經脈証辨別表裏之寒熱虛實再讀葉天士所論溫熱諸集便能洞澈了然惟雜症一門最難種類紛繁變動莫

測金匱一書既未全備且論症又甚簡略其餘精深之理散見於先賢專集之中就中風一症言劉李朱張認症不同言理各別學者根柢未深斷不能折衷一是轉致目眩心迷茫無把握世人往往抱一家之言以爲主宰或攻或補或涼或溫喜攻者遇虛症亦攻喜補者遇實症亦補喜涼喜溫者亦不審症之陰陽概以素所執持者竊試閱歷未深膠於成見誤人而不自知誤治而不能改俗云熟讀王叔和不如臨症多此乃世醫欺人之語非確論也心中無此理解即臨症百千仍屬茫然不悟所以多讀名賢專集爲第一義又千金方外臺秘要証準治繩等書兼收博採搜羅富有實醫學之大觀然所載方藥湯頭最爲廣博而古人辨論之處轉略而不詳其專論脈症而不及方法者如巢氏病源等書則條目太繁語少陋劣亦非善本現爲後人醫學計須倣外臺準繩體例專集前賢論說及醫案中議症之詞爲之平情判

斷加以案語錄其所長刪其所短辨其同異序其淺深或會通焉或并存焉令學者一目了然循序漸進人人皆可自底於成則中國名手自不乏人余存此志久矣而學識尙淺力有未逮惟有望於世之同志者

凡學問由博而反約由粗而至精始能左右逢源動中肯綮中國醫學既無總括貫通之部而選本又不足觀選本須由總集內提出掇其精義聚其要言眉目必清語言必當始有益於後學如馮氏錦囊醫學心悟等書其中節目雖備然每症中祇錄數語詳其所當然略其所以然餘乃擇錄方法視之似甚簡當而於認症處毫無體察是存渣滓而棄精微也故此種書籍貽誤後人不淺學者入手之時必得通人指示可以從入之途先於內經傷寒金匱三書時時默誦竭力講求然後再覓各家專集一一翻閱比較則根柢既深見地既高始無見異思遷之患但以此習醫實非易易猶非寒士所能辦耳

坊刻僞書家藏秘本在在皆有指不勝屈無知之輩喜其卷冊無多方法又簡以爲醫門捷徑莫過於此因執成方爲人醫治間獲效驗遂自信神奇而炫耀於人世入若詰其方法究所由來則曰此我家祖傳秘法或得之異人傳授均不能告人是則旁門左道最足以欺世而害人者也夫岐黃正大之法精微之理詳載於素問靈樞後世名賢迭起篇籍浩繁仍不過發明其意擴充其法絕無自出新奇而出素靈之範圍者學者非專心致志力事研求不能得豁然貫通之境若求捷便之徑簡當之法雖岐黃再生亦不可得也而俗云單方勝是名醫者亦有說焉雜症中一症有一症專藥世醫不知講究不能審症不能用藥故癱瘓鼓膈諸症一及於身濛朧施治百中不能救一間有爲單方治愈者是專症適與專藥相合立刻起死回生不異神仙丹藥但治甲則效治乙則不效乃同一症也而虛實迥別眞僞攸分非藥不效也

審症未確藥與病未能的對耳故醫者以認症爲最要考藥次之徒抱單方者往往治誤害事矣况僞書秘本多托單方之名以欺世並不得以單方目之只目之爲離經畔道之書而已後學戒之

中國醫學代出名人然其中弊端有二驕與吝而已有驕心者每以攻訐爲事有吝心者每以秘藏爲事

攻訐之弊不特喜言古人之所短並思僣古人之所長夫古人學問本不能全而不偏純而不雜後人果能指其疵而救正之補其闕而增益之由漢至今數千百年神聖創於前賢哲繼於後各症精微之理後學造就之方愈推愈廣闡發無遺集醫學之大成使有等級可循皆能歷階而造其極無如後人稍有見地便思駁倒古人以自伸其說而自爲其異古人偏雜之處固當匡其失而削之其正大之理則當引伸其說而爲後學法程而反引據經典

以駁之或強設新義以抑之以爲駕古人而上之始能自顯抑知矯枉失正者既攻訐乎古人即不免後人之攻訐反覆相尋理無一定學者學業未深胸無定見鮮不爲所惑矣此又習醫之一難也

秘藏之弊一留以遺子孫一示人以莫測如喻嘉言論痰囊症究窠囊之所由成及窠囊之貽後患既詳且盡而論治法則曰以藥破其囊而滌其痰所用何藥則無傳矣徐靈胎集內論痰囊亦頗精確而方法亦未傳世其論肺癰症也言虛實之不同變幻之難測調治之不易薈萃古書採擇方法加以秘方禁方治法始備歷治多人無不神效然其言誠是矣其病情之變態認症之確據及所集之秘方禁方概未傳出世無知者其餘雜症中所考驗有得無不明知之而故秘之此又習醫之一難也

以上二弊非立學堂學會學報不能挽回學有宗旨有公理公理者人人皆